

**Zeitschrift:** Bündner Schulblatt = Bollettino scolastico grigione = Fegl scolastic grischun  
**Herausgeber:** Lehrpersonen Graubünden  
**Band:** 66 (2004-2005)  
**Heft:** 5: Sexualpädagogik und AIDS-Prävention  
  
**Rubrik:** Pagina Rumantscha

### **Nutzungsbedingungen**

Die ETH-Bibliothek ist die Anbieterin der digitalisierten Zeitschriften. Sie besitzt keine Urheberrechte an den Zeitschriften und ist nicht verantwortlich für deren Inhalte. Die Rechte liegen in der Regel bei den Herausgebern beziehungsweise den externen Rechteinhabern. [Siehe Rechtliche Hinweise.](#)

### **Conditions d'utilisation**

L'ETH Library est le fournisseur des revues numérisées. Elle ne détient aucun droit d'auteur sur les revues et n'est pas responsable de leur contenu. En règle générale, les droits sont détenus par les éditeurs ou les détenteurs de droits externes. [Voir Informations légales.](#)

### **Terms of use**

The ETH Library is the provider of the digitised journals. It does not own any copyrights to the journals and is not responsible for their content. The rights usually lie with the publishers or the external rights holders. [See Legal notice.](#)

**Download PDF:** 26.11.2024

**ETH-Bibliothek Zürich, E-Periodica, <https://www.e-periodica.ch>**

# Commentari tier in «tsunami» sursilvan

da Martin Mathiuet

Savevas Ti tgei ch'in TSUNAMI seigi – jeu buc! Las consequenzas ein sgarscheivlas e nuncapeivlas. La natira ha puspei mussau a nus ina gada dapli cun tgei pussonza ch'ella sa seprentar e con svaneivels nus humans essan atgnamein! En quei senn stuess ins far in punct e quescher! Tonpli sch'ins ei staus en quella regiun e ha viu il paradis leu (sco turist).

Quei maletg dall'unda furibunda che savischina alla riva ch'jeu hai viu alla televisiun persequitescha mei! Ed jeu vegnel a seser l'otra gada alla mar cun auters sentiments che tochen ussa, malgrad che la mar aveva gia laguti avon il Tsunami terribel ella Asia dus da mes collegas e dau els a nus terresters sco baras – silmeins sco baras!

Els raussien en pasch!

Ins perstgisi sch'jeu prendel quei maletg dall'unda furibunda ch'ins vesa e sa ch'ella vegn e destruescha tut quei che stat si per si per tematisar in problem che s'avischina alla Surselva ed allas autras regiuns perifericas, bein calculabels mo nunevitabels! E biars da nus miran el tschiel blau sco turist alla riva ed ein gnanc conscients tgei che schabegia atgnamein.

Aunc ha la Surselva 14 scalems superius da scola populara. Leutier vegn ina buna purschida ella scolaziun professiunala ed en scola media. Il svilup demografic – las naschientschas en Surselva sereduceschan da ca 600 per onn els onns 60/70 giu sin rodund 200 egl onn 2002 – il niev sistem da subvenziun dallas scolas popularas dil cantun (mesiras da spargn), la situaziun finanziaria da biaras vischnauncas e l'introducziun dil niev concept per il scalem superius cun la promoziun dil model C sforzan las autoritads corrispundentas da tscherchar ina soluziun responsabla pil futur. Gl'inspectorat da scola dalla Surselva ha realisau la problematica che s'avischina ed ha envidau ils pli pertucchai ad in'informaziun e discussiun.

Ussa ein ins vidlunder da studegiar co ins vul sligiar quei problem. Co la sligiazion per il scalem superius dalla Surselva vesa ora stat ellas neblas. Sch'ei resta la finala treis, quater ni tschun centers pil scalem superius en Surselva ei il mument speculaziun. Segir denton ei ch'ei dat ina restructuraziun radicala che pretenda da tuts ultimativamein il cumiau definitiv da bia da quei che pareva e secaveva da sesez. Quei ton per scolarAs, geniturs, scolastAs ed autoritads. Ei vegn buc a restar bia auter che d'acceptar che l'organisaziun, la logistica da scola mo era la didactica e metoda d'instrucziun ston ir sur ils cudischs da camifò. Sil pli tard cu in agen affon ha da far in via di da scola da pli che duas uras per di (ed il bab e/ni la mumma ca tuttina bia per ir a luvrar) vegnan ils geniturs a sedumandar sch'ei fussi buc pli prudent da midar casa! Tgei schabegia cun nos vitgs, nossa cultura, nies lungatg?

E tgei sei cun las consequenzas economicas? Ina roscha piazzas da scolasts vegnan a svanir en Surselva. Biars pagataglias vegnan a muncar e tgi baghegia aunc casa, sche buc ils scolasts e las scolasts. Tgei schabegi cun il stagner, il miradur, il sorprendider? Sil pli tard cu quei capetel da nossa historia ei screts forsa ch'ins realise-scha tgei muntada economica che la scola ha en Surselva ed ellas regiuns perifericas insomma. Las scolas ch'ein commembras dalla «formaziun bildung regiun surselva» (scolas medias, professiunals e purschidas da formaziun per carschi) – per prender in exempel – pagan onn per onn ca 9 milliuns

pagas a personal d'instrucziun. Tgei capital d'investiziun che vegn mess en rocla cheutras han certins ord l'economia e politica aunc buca capiu. Sch'ins pren la «formaziun bildung regiun surselva» sco holding fuss quella ina dallas pli grondas interpresas dalla Surselva. Forsa ch'ins vegn plaunsiu conscients dalla muntada era da quella sparta economica e tarmetta meins scolars ed emprendists ord la regiun per l'instrucziun. Ord optica regiunaleconomica eis ei ina camelaria da promover la monocultura dil turissem d'unviern. (Ord optica da menaschi dalla branscha hai jeu tutta capientscha per quei). Il traffic da Flem-Laax sa buca pli che dar ensemen. Igl ei neras uras da dar cunterpeisa e tschintschar «clartext». Sche nus lein restar vinavon ina regiun attractiva nua ch'ei vala la peina da prender dimora, ha ei num da semetter ensemen subito, emblidar protecziunissem e particularissem, tscherchar el desaster ina schanza, concentrar las forzas ed ir cun vigur ell'offensiva! Ina schanza havein nus mo sco regiun! Schanzas da crescer economicamein havein nus cun la formaziun, cun la tecnologia da comunicaziun ed informaziun, cun la cultura ed il lungatg romontsch singular (in capital che negin ha, perquei eis ei bein in sbagl nunperduabel da marketing da montar tablas tudestgas allas portas dalla Surselva), cun nossas competenzas da convivenza ella pluricultura, cun noss'aua, nossa cuntrada, il turissem da stad, cun products da qualidad exclusiva, etc. Mintgin ha potenzial... alla lavur!

